

Twie jaor

TWIE JAOR

(Teniel: pat van een vaort, mit riet d'r veur langes. Achter et riet een grote tobbe mit waeter, die veur et pebliek niet te zien is.

Personen: Jan de Boer en Pieter Hoogeveen, twie oolde mannen, beide amateur-viskers; Jouk Schipper, timmerman bi'j et sanatorium Beatrixoord; De Groot, veldwaachter.

As et doek cupengaot, is et teniel leeg, mar vot-en-daolik komt De Boer op, mit angel, leefnet, visstoeltien, tasse enz. Hi'j lopt staorig, en zocht een geschikt plakkien om zitten te visken)

Jan Zó, dan za'k et hier toch mar es perberen. Bi'jglieks gaot et mi'j vandaege beter of as vleden zaoterdag. A'k daor nog an daenke, kan 'k mi'j zels nog wel ik wete niet wát doen! Hoe he'k dat doe toch had! 'k Begriep nog niet, hoe 'k die snoek zó reer verspeulen kon. En 't was ok gien kleintien! 'k Zal niet overdrieven, mar vieftien pond was ie grif wel! 't Kan ok wel achttien wezen. Verdri'jd nog an toe! 'k Mag mi'j zels niet zien! Wat há'k Pieter de ogen uutstikken kund. En die kliek van 't sannetorie! Die mienen, dat zi'j allienig mar visken kunnen. Wat zóllen ze opkeken hebben! Iewig jammer, dat 't zo gaon is. Lao'k d'r mar niet te veule meer over prakkezen. Mar 't beroerdeste is nog, dat die smeerlap d'r mit mien ni'je snoer en blinkerd vandeur gaon is. (Intied het hi'j zien snoer maekt en de dobber in de tobbe gooid) 'k Zal 't vandaege mar es op karper perberen. Dat ligt mi'j, a'k eerlik bin, ok wél zo goed. Waacht es..... 'k heb leuf ik al biet! Ja, ja, toe mar mien joongien, zo gaot ie goed! Wat toekert die kurke mooi! Nog ien keer en dan..... (Hi'j haelt op en d'r bongelt een voorntien an de angel. Die is deur de souffleur an de haoke daon) Och heden, dat vaalt mi'j niet mit. Wat een schietterig ding. Mar 't begin is d'r en 't is een mooi aovissien veur snoek. (Dot et vissien in et leefnet en

hangt dat vlak bi'j waor hi'j zit, in et waeter. Om et vaaste te maeken stikt hi'j zien reserve-angelstok in de grond.) Now hoop ik in de wereld niet, dat d'r hier vandemorgen méér viskers kommen. An al dat gestommel en gepraot he'k mar een dekselse hekel. Mar, a'k mi'j niet vergisse, komt daor al iene an ! Ja, daor hej' 't gegooi in de glaezen al ! Now kan 'k wel op de pot zitten gaon !

't Is verentig Jouk Schipper, die praotmusse. Now, 'k zal him vlogge kwiet zien te wodden.

Jouk (komt op een autoped op; angelstok en eer visgerei daoran vaastebunnen. Stopt bi'j Jan) Goeie ! Now, ie laoten ók gien spinrag veur de bedsdeurties gruuien ! Ie bin d'r mar op 'e tied bi'j !

Jan (kikt van Jouk naor de autoped en van de autoped naor Jouk) Ok morgen ! Mar wat hewwe nów an de fiets hangen ? Ik miende, dat ie een auto hadden !

Jouk (kikt wat sneu) Ja, dat is ok zo, mar..... eh..... eh..... ik bin..... zakt !

Jan (verheerd) Zakt ? Waor bi'j' in zakt, jongkerel ?

Jouk (verlegen) Nargens in, mar ik bin zakt veur mien riebewies. (haostig) Ja, niet da'k niet rieden kan, heur, mar.....

Jan (vaalt him in de rede) Ja, ja, ik begriep 't al ! Aj' niet scheuvellopen kunnen, dan ligt et an de scheuvels, en bi'j jow zal 't wel an de auto liggen. En now docht ie : mit de auto is 't pet en daarom gao 'k dan mar mit de autoped ! Ja, ja, as een meenske gek wodt, komt et him in de plasse an ! Mar ik har eers liever had, dat ze jow die kladde mar geven hadden, want mit dat staampen mit dit meraokel jaeg ie alle vissen op 'e loop.

Jouk (lachende) Now, dat vaalt wel wat mit. Mar hoe is 't, wil 't wat ?

Jan Of 't wat wil ? Nee, 't kan gien pochen lieden. Wat klein goed. Mar hier zitten eers wel dikken heur. Vleden weke he'k nog een knaop verspeuld ! Zoe'n iene ! (geft de maot mit de hanen an) Wel een pond